

Pagalungan jadi pilihan jalankan khidmat komuniti

Rentas Borneo capai matlamat

UM 13.5.2015 26

Oleh **SAPURAH LIYUNAN**

pengarang@utusan.com.my

■ NABAWAN 12 MEI

PROGRAM Rentas Borneo 2015 yang bertujuan mendekatkan Universiti Malaysia Sabah (UMS) dengan masyarakat pedalaman di negeri ini berjaya mencapai matlamatnya apabila 92 ahli rombongan yang menggunakan 23 buah kenderaan pacuan empat roda selesai melaksanakan tugas masing-masing.

Rentas Borneo 2015 yang dianjurkan Fakulti Psikologi dan Pendidikan (FPP) serta Fakulti Perubatan dan Sains Ksihatan (FKSK) itu memilih daerah kecil Pagalungan dekat sini bagi menjalankan khidmat komuniti dan penyelidikan sosioekonomi masyarakat.

Pengerusi Rentas Borneo yang juga Dekan FPP, Prof. Dr. Ismail Ibrahim berkata, selain menyatukan UMS dengan masyarakat, peserta juga dapat menyelami dan memahami cara hidup masyarakat yang mempunyai akses terhad ke kawasan mereka.

“Penduduk di Pagalungan menyambut baik pendekatan yang UMS jalankan dan berharap semoga akan ada rentetan program sebegini diadakan di kawasan mereka pada masa akan datang,” jelasnya ketika ditemui di sini baru-baru ini.

Menurut beliau, peserta Rentas Borneo 2015 turut mengadakan beberapa aktiviti kemasyarakatan, pendidikan serta persembahan kebudayaan kepada masyarakat di situ.



SALAH seorang tenaga pengajar UMS menyampaikan ceramah motivasi kepada para pelajar dalam Rentas Borneo 2015 di daerah kecil Pagalungan, Nabawan, baru-baru ini.

“Antara aktiviti yang dijalankan ialah bengkel motivasi bahasa Inggeris yang dikendalikan Dekan Fakulti Kewangan Antarabangsa Labuan, Prof. Madya Dr. Syed Nasirin Syed Zainol Abidin selain bengkel serta pertandingan melukis dan mewarna oleh Timbalan Dekan Hal Ehwal Pelajar dan Alumni, Fakulti Kemanusiaan, Seni dan Warisan (FKSW), Prof. Madya Dr. Baharudin Mohd. Arus.

“Kita juga mengadakan kelas vokal oleh pensyarah FKSW, Sharip Zainal Sagkif Shek Sagkif, ceramah akademik dan kaedah membuat permohonan kemasukan ke universiti, sumbangan pakaian, pertandingan karaoke, pameran kenderaan pacuan empat roda, demonstrasi kenderaan serta lawatan ke rumah panjang di Kampung Selungai,” ujarnya.